

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1021644 23 St
Sarajevo, 23.12.2024. godine

Općinski sud u Sarajevu, stečajni sudija Marijana Rajčević, u stečajnom postupku nad imovinom stečajnog dužnika BUSINESS ADVICE AND SOLUTIONS Društvo za proizvodnju, konsalting i usluge d.o.o. Sarajevo, Trg Barcelone broj 5, Sarajevo – Novi Grad, kojeg zastupa stečajni upravnik Besim Hamidović iz Sarajeva, Osik do broja 7, Ilidža, van ročišta dana 23.12.2024. godine donio je:

RJEŠENJE

Zaključuje se stečajni postupak nad imovinom stečajnog dužnika BUSINESS ADVICE AND SOLUTIONS Društvo za proizvodnju, konsalting i usluge d.o.o. Sarajevo u stečaju, Trg Barcelone broj 5, Sarajevo – Novi Grad, JIB: 4201761480006, Matični broj: 65-01-0540-12, zbog nedovoljnosti stečajne mase.

Razrješava se dužnosti stečajni upravnik Besim Hamidović iz Sarajeva, Osik do broja 7, Ilidža.

Po pravosnažnosti ovog Rješenja, isto će biti dostavljeno Odjeljenju registra privrednih subjekata Općinskog suda u Sarajevu, radi brisanja stečajnog dužnika iz sudskog registra - registarski uložak broj: 65-01-0540-12.

Obavještavaju se stečajni dužnik, stečajni upravnik i povjerioci da pravne posljedice zaključenja stečajnog postupka nastupaju osam dana nakon objavljivanja ovog rješenja u "Službenim novinama" FBiH.

Ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija na prijedlog stečajnog upravnika, povjerioca stečajne mase ili po službenoj dužnosti određuje naknadnu diobu, a na postupak naknadne diobe na odgovarajući način se primjenjuju odredbe člana 192. stav 3. i člana 193. i 194. Zakona o stečaju.

Ovo Rješenje će se objaviti na oglasnoj tabli suda, web stranici suda-elektronskoj tabli suda, "Službenim novinama FBiH" te dostaviti FIA-i.

Obrazloženje

Rješenjem ovoga suda broj gornji od 12.03.2024. godine otvoren je stečajni postupak nad imovinom stečajnog dužnika BUSINESS ADVICE AND SOLUTIONS Društvo za proizvodnju, konsalting i usluge d.o.o. Sarajevo, Trg Barcelone broj 5, Sarajevo – Novi Grad, te je za stečajnog upravnika imenovan Besim Hamidović iz Sarajeva, Osik do broja 7, Ilidža.

Navedeno Rješenje je objavljeno u „Službenim novinama F BiH“ broj 24/2024 od 29.03.2024. godine.

Na prvom ispitnom ročištu održanom dana 20.05.2024. godine ispitane su prijave potraživanja stečajnih povjerilaca: Porezna uprava FBiH, Kantonalni porezni ured Sarajevo i Uprava za indirektno/neizravno oporezivanje BiH, Regionalni centar Sarajevo (ukupno dvije prijave), te utvrđene i priznate ukupne obaveze stečajnog dužnika u iznosu od 130.368,22 KM, od čega su priznata potraživanja višeg isplatnog reda iznosila 39.028,73 KM, a priznata potraživanja opšteg isplatnog reda iznosila 91.609,49 KM. Osporenih potraživanja nije bilo.

Odmah nakon završenog ispitnog ročišta u nastavku je održano Izvještajno ročište-Skupština povjerilaca. Na tom ročištu stečajni upravnik je podnio Izvještaj o ekonomskom stanju stečajnog dužnika te upoznao sud i prisutne povjerioce da je osnovna djelatnost stečajnog dužnika bila kamenoprerađivačka proizvodnja, da na dan otvaranja prethodnog postupka nije obavljao registrovanu djelatnost, a na dan otvaranja stečajnog postupka uposlenici koji su zatečeni u radnom odnosu uredno su objavljeni putem Federalne porezne uprave, Ispostava Novi Grad. Imovinu stečajnog dužnika činila je samo pokretna imovina i to mašina za rezanje kamena procijenjene vrijednosti u iznosu od 5.000,00 KM. Stečajni dužnik nije imao nekretnina u svom vlasništvu niti su zatečena novčana sredstva na računima koji su blokirani, nije imao neiskorištenog uplaćenog kapitala niti evidentiranih potraživanja po osnovu poslovnih transakcija, odnosno aktivnosti, a nije bilo ni otvorenih sudskih postupaka. Osim toga stečajni upravnik je naveo da nema uslova da se poslovanje stečajnog dužnika nastavi, da stečajni dužnik ima pokretne imovine iz koje se mogu izmiriti troškovi stečajnog postupka i dugovi stečajne mase te djelimično namiriti potraživanja povjerilaca. Nakon toga skupština povjerilaca je donijela odluku da se daje podrška stečajnom upravniku da nastavi raditi u ovom stečajnom postupku i da mu se daje ovlaštenje da pristupi unovčavanju pokretne imovine uz ograničenje da se ista ne može prodati ispod iznosa od 5.000,00 KM.

Podneskom od 14.10.2024. godine stečajni upravnik je obavijestio sud da je tokom postupka izvršena prodaja pokretne stvari stečajnog dužnika – mašine za rezanje kamena kupcu TECHNO-TRADE d.o.o. Sarajevo, Krivoglavci bb, Vogošća, za ukupan iznos od 6.844,50 KM sa uračunatim PDV-om, koji je cijelosti isplatio kupoprodajnu cijenu. Uz podnesak stečajni upravnik je priložio Zapisnik o prodaji imovine, a dana 16.12.2024. godine je dostavio i dokaz o uplati kupoprodajne cijene i to Izvoda broj 4 ASA Banke od 19.11.2024. godine u iznosu od 1.500,00 KM i izvoda broj 6 ASA Banke od 13.12.2024. godine u iznosu od 5.344,50 KM, dakle ukupno 6.844,50 KM. Nakon tog sud je donio Rješenje o dosudi pokretne stvari dana 17.12.2024. godine.

Dana 19.11.2024. godine, a s obzirom da je izvršio unovčavanje pokretne (jedine) imovine stečajnog dužnika, stečajni upravnik je dostavio Prijedlog završne diobe kojim je obavijestio sud da je iznos stečajne mase raspoloživ za diobu 4.000,00 KM. Imajući u vidu odredbe o priznatim potraživanjima razvrstanim u isplatne redove koja se uzimaju u obzir prilikom diobe predložio je davanje saglasnosti na završnu diobu i to na način da se viši isplatni red sa potraživanjem od 39.028,73 KM namiri u procentu od 10,25 % odnosno u iznosu od 4.000,00 KM dok za opšti isplatni red nije predviđeno namirenje te je predložio sazivanje ročišta za završnu diobu jer je unovčena cjelokupna imovina koja spada u stečajnu masu.

Shodno navedenom, primjenom odredbe člana 188. Zakona o stečaju („Službene novine FBiH“, broj 53/21) sud je dana 21.11.2024. godine donio Rješenje o zakazivanju ročišta za završnu diobu za dan 17.12.2024. godine, te je u Rješenje unijet prijedlog diobe. Ovo

Rješenje dostavljeno je povjericima te je objavljeno na Oglasnoj tabli suda, web stranici suda-elektronskoj tabli suda i objavljeno u „Službenim novinama FBiH“ broj: 94/2024 dana 27.11.2024. godine.

Dana 17.12.2024. godine održano je ročište za završnu diobu i skupština povjerilaca na kojem su povjerioci upoznati sa prijedlogom diobe i mogućnošću mijenjanja ili dopunjavanja prijedloga, ukupnim iznosom rapoloživim za diobu i načinom djelimičnog namirenja priznatih potraživanja. Stečajni upravnik je podnio izvještaj o preduzetim radnjama, obavijestio prisutne da je ukupan iznos priznatih potraživanja 130.368,22 KM, od čega je u viši isplatni red razvrstano potraživanje Porezne uprave FBiH u iznosu od 39.028,73 KM, a u opšti isplatni red razvrstano potraživanje Porezne uprave FBiH u iznosu od 55.666,93 KM i potraživanje Uprave za indirektno oprezivanje BiH u iznosu od 35.942,56 KM, ukupno 91.609,49 KM te je predložio da se da saglasnost na prijedlog diobe i to tako da se viši isplatni red u koji je razvrstano potraživanje Porezne uprave FBiH u iznosu od 39.028,73 KM namiri u procentu od 10,25 % odnosno u iznosu od 4.000,00 KM dok za opšti isplatni red nije predviđeno namirenje. Nakon što su oba prisutna povjerioca izjavila da nemaju primjedbi na prijedlog diobe, prijedlog je stavljen na glasanje i konstatovano je da je isti usvojen od svih povjerilaca jednoglasno, a stečajni upravnik je podnio prijavu nedovoljnosti stečajne mase i prijedlog da se stečajni postupak zaključi jer nakon isplate sredstava povjeriocu te naknade troškova stečajnog postupka i dugova stečajne mase neće više biti sredstava za namirenje preostalih potraživanja, na koji prisutni povjerioci nisu imali primjedbi.

Shodno navedenom i odredbi člana 188. stav 6. Zakona o stečaju sud je donio Rješenje da se daje saglasnost na prijedlog završne diobe i naloženo je stečajnom upravniku da izvrši diobu te dokaz o izvršenoj diobi dostavi sudu nakon čega će se dalje postupati shodno odredbama člana 190. i 200. Zakona o stečaju.

Nakon toga stečajni upravnik je podnio završni račun i izvještaj, odnosno izvještaj o ukupnom prilivu na račun stečajnog dužnika u iznosu od 10.744,50 KM i troškovima stečajnog postupka kao i prijedlog nagrade za stečajnog upravnika i naknade troškova, a koji mu u dosadašnjem toku postupka nisu isplaćeni i to: iznos od 4.836,00 KM bruto na ime nagrade, iznos od 444,50 KM na ime naknade nužnih troškova te iznos od 1.464,00 KM na ime dugova stečajne mase čime bi račun dužnika bio ugašen, a svi nužni troškovi stečajnog postupka i dugovi stečajne mase bili namireni. Prisutni povjeriocu nisu imali primjedbi na navedene prijedloge.

Dana 19.12.2024. godine stečajni upravnik je dostavio izvještaj i dokaz o izvršenoj diobi, odnosno uplatnicu od 18.12.2024. godine na iznos od 4.000,00 KM u korist Budžeta Federacije BiH te je ponovo predložio da se stečajni postupak zaključi. Osim toga je dostavio dokaz o uplati u iznosu od 50,00 KM na ime troškova objave oglasa o zaključenju stečajnog postupka.

Odredbom člana 190. stav 1. i 2. Zakona o stečaju propisano je da stečajni sudija nakon okončanja završne diobe donosi rješenje o zaključenju stečajnog postupka nakon što stečajni upravnik stečajnom sudu podnese izvještaj o završnoj diobi i dokaz o izvršenoj diobi. Odredbom člana 200. stav 1. istog zakona propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a u stavu 3. istog člana propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija na prijedlog stečajnog upravnika, povjerioca stečajne mase ili po službenoj dužnosti određuje naknadnu diobu, a na

postupak naknadne diobe na odgovarajući način se primjenjuju odredbe člana 192. stav 3. i člana 193. i 194. ovog zakona.

Shodno navedenom, kako je u ovom postupku izvršeno unovčavanje cjelokupne imovine stečajnog dužnika, izvršena dioba raspoložive stečajne mase, dostavljen dokaz o izvršenoj diobi i isplati sredstava povjeriocu, dostavljen izvještaj o preduzetim radnjama te načinu namirenja troškova postupka i dugova stečajne mase, izvršena prijava nedovoljnosti stečajne mase od strane stečajnog upravnika i podnijet prijedlog da se stečajni postupak zaključi na šta stečajni povjerioci nisu imali primjedbi, to su se shodno navedenom članu 200. stav 1. Zakona o stečaju stekli uslovi da se stečajni postupak zaključi pa je sud donio odluku kao u izreci.

Na osnovu člana 190. stav 10. Zakona o stečaju FBiH, Rješenje o zaključenju stečajnog postupka se objavljuje na oglasnoj tabli suda, web stranici suda-elektronskoj tabli suda, "Službenim novinama FBiH" te dostavlja FIA-i.

Odluka o brisanju stečajnog dužnika iz sudskog registra donesena je na osnovu odredbi člana 108. Zakona o stečaju FBiH.

STEČAJNI SUDIJA
Marijana Rajčević

POUKA O PRAVNOM LIJEKU:

Protiv ovog rješenja dozvoljena je žalba. Žalba se podnosi Kantonalnom sudu u Sarajevu putem ovog suda u 3 (tri) primjerka, u roku od 8 dana po proteku 5 dana od objave rješenja u „Službenim novinama FBiH“.